

C V D

A I G C

1 6 9 9

D. 4. 44

~~20 300~~

20 a

g. 2 g. 4/10
~~20~~ 199. X

Neue Zeitung

14
Wahrhaftiger vnd gründlicher
bericht vnd anzeigung / des ganken Han-
dels vnd schlacht / So sich wegen der Cron Polen / zwis-
schen dem Gros Kanzler / vnd König Maximilliano /
vnd für Pittschen in Schlesien geschehen /
zugetragen / Anno 1588.



Erstlich Gedruckt zu Ulmütz / Im Jar 1588.

1587

Verzeichnis der Grundstücke

in der Pfarre St. Marien
zu Magdeburg
am 1. Junii 1587

Nr.	Grundstück	Größe	Besitzer
1	St. Marien Kirche	1200	St. Marien
2	St. Marien Pfarrhaus	100	St. Marien
3	St. Marien Schulhaus	80	St. Marien
4	St. Marien Friedhof	2000	St. Marien
5	St. Marien Wiese	500	St. Marien
6	St. Marien Garten	300	St. Marien
7	St. Marien Acker	1500	St. Marien
8	St. Marien Feld	2000	St. Marien
9	St. Marien Holz	1000	St. Marien
10	St. Marien Wasser	500	St. Marien

1587





Am 12. Januarij sein wir gen Krippis komen / da wir die Kön. May. vnd den Graffen von Burckaw in der ganze Leger antreffen / welches fürwar gar geringe / vnd was noch vbrig war / fast alles Kranck lag / Weil aber Krippis ein loses Hölzerns Gebew / ist vnuer- schlossen / allein das Schlos ist etwas wegen des umbliegenden Ge- sämpes feste / hat sich der König darin nicht vertrauen wollen / vnd ist auffgebrochen den 13. Januarij gen Welumb kommen / da haben wir gelegen bis auff den 22. Januarij / da dann die gröste arbeit war Panctieren / spielen etc. haben keine gewisse kundschafft gehalten.

Die Polacken so es mit ihrer May. niemals trewlich gemeinet / haben den frommen Herrn mit ihrer grossen verheissung / dahinder nichts gewest / genzlich verblendet vnd schendlich verführet. Diesen tag komet ein schnelles geschrey / der Feind sey nicht anderthalbe meil 15000. starck von Melin / da bey den fromen König kaum 800. vnd doch viel Francke in der Stadt waren / da wolt es nicht lenger zu war- ten sein / brachen geling auff / da der König auff sein wil / schreibt er zuvor mit einer demut in eine gl. scheibe das Jar / den tag / wenn er da auffgebrochen were / vnd darunter *Veniens veniam & non tardabo Maximilianus Electus Rex Polonia* vnd faren diesen Tag gen Prig- schen / gehöret den Herzog von Priga zu / da traffen wir an den Heinrich Walden welcher allda die grenze mit 500. Deutschen Reu- tern / vnd etwan mit so viel Fußvolcks verwaret.

Da wir kommen / zeugt er mit den seinen aus / vnd giebet den Königlichen platz / Wir vermeinten der König würde vns bald fol- gen / so ist im der Feind so nahe nach geeilet / das ihre May. mit iren Reutern die ganze Nacht in der ordnung im Felde haben fortrücken müssen / es war hefftig kalt / kamen also den 23. Januarij eine stunde für tage gen Prigschen sehr müde / erfroren vnd abgemartert / sampt allen den seinen / wie er komet ohne gefehr / vmb 22. Uhr da komet eine Post / der Feind sey verhanden / wird auch in vnd für der Stadt Lärm geschlagen / Da wird ein greulich Aufflauffen vnd Geschrey / man wird gelings Nachts / ihre Mayestat sol alsobald nach Namflo

auffbrechen/ diß widerraten die schelmischen schlimmen losen Polack-
cken/die den frommen Herrn allda wolten in der feinde hende vberant-
worten/da setzet sich der fromme Herr trawriglichen nider/ vnd saget/
wenn nu meine Ungern da weren/in dem komet eine reitende Post/
die Mehrer weren ankomen/vnd die Ungern weren eine Meile von
Prisschen/ wo sie ire May. hin ordnen oder haben wolt / da wolten
sie anziehen. Darauff fasset ire May ein heris/ ließ die taffel anrich-
ten/ah vnd tranck etwas leichtmätiger denn zuvor frule. In des schi-
cket der Cansler seinen fortrab etwan 500. Tartern vnd Cosacken
loß gestude hin/ die brennen diesen abend 3. Dörffer weg / da ziehen
die vnser fast alle hinaus/treffen doch keinen feind an/ auffer etliche
schelm/so sewer anlegen/vnter diesen wird einer gefangen/ wird für
den König bracht / werden ihm taumstöck angeleget / mit etlichen
Lichten brante man in an das lincke Ohr/das er bekennen solte/ wo
der Feindt were/wie starck er were/vnd was er fürhabens were. Die-
ser schelm saget aus der fürtrab were 500. starck/ welches war war/
vnd der Cansler mit seinem Volck were auch 2. meilen von dem ort/
(Ah wehe der verblendung)man beruhet auff dieses schelms aussage/
schicket nach keiner andern kundschafft aus / vermeint es sey an die-
sem genug / der Graff von Scholack ist diese Nacht heimlich bey dem
Cansler gewest (den der fromme König alle seine heimlichkeit ver-
trawet) vnd hat neben andern Polacken diesen frommen Herrn vnd die
seinigen schendlich verraten/ohne gefehr drey viertel meilen von der
Stadt/ Ist ein langer doch schmaler Lamb / vber einem Teich/ das
neben ist lauter gemöß/das man nirgends hat können gen Prisschen
komen/ Denn vber diesen Lamb / da auffss meiste haben drey neben
einander reiten können/ vber diesen Lamb lassen sie den Feind vnge-
hindert Zwölff tausend starck kommen/die vnserige liegen ein viertel
Meile vom feind vnd haben von diesem vberzug keine kundschafft/
also hat sie des Tartern vorige aussage (der doch vnter den hendern
wider verloren worden) eingenommen / man hielt etwa ein stund
oder vier in die Nacht vergeblichen im Felde / vngesehr drey stunden
vor tage rücket man wider naus/ vnd stossen die Ungern vnd Mehr-
rer

ter wider haus / wie es eine stunde auff den Tag ist / lest ihm der K^{ön}ig seine Rüstung anlegen / reitet aus / in willens die Ungern zube-
sehen / welche denn schon in der ordnung auff der rechten hand hielt-
ten / der Stammischki vnd die ander Polacken hielten auff der Lin-
cken hand / die Teudschen vnd das Fuhvolck in der mitten / mit dem
Geschütze / der Cansler hielt auff einer grossen höhen mit seinem
Volck / nam alle die fortheil ein / so die vnsern verliessen / welche ver-
blendet in einem thal hielten / wie man zu hauße rücket / sahe man des
Canslers Volck wie einen schwarzen Wald / in halber Monats ge-
stalt / vnd sind ihr Zwölff tausend gewesen / vnd im hinderhalt drey
tausend / da der vnser kaum 5. tausend waren / diß weret kaum eine
stunde / komet ein geschrey / der König wer schon in die Stadt / vnd
war eine grausame flucht der vnsern.

Es hat sich aber damit also zugegetragen / Wie der Stammischki
mit den Polacken auff der linken seiten troffen / vnd der von Dy-
persdorff mit Herr Melchior Kädern in der mitte / vnd etwas da-
zu rücke trieben worden / warnet man den König er solte ein wenig
zu rücke weichen / denn die gefahr sehr gros were / wie der König ein
wenig weicht / vnd es seine Reuter gewar worden / geben sie alle die
flucht / vnd werden also in ein viertel stunde in der flucht in die 3077.
Menschen / wie sie hernach gezelet worden sind / nider gestochen ge-
set. offen vnd gehawen / wie der König aus der schlacht in die Stadt
kommen / helt er auff dem Platz fast ein stund / in des war die ganze
Stad berennet / in einer $\frac{1}{2}$ stund hat man vñ vñ vñ die vorstadt an-
gesteckt / ward sewer in der Stadt vnd brenet ein Haus bey dem Thore
weg / man rücket auch grosse stücken (ja auch dieselben so man im
Felde gelassen / vnd keins gebraucht) für die Stadt / vnd schos ge-
waltig in die man ten vnd thoren / Man machte auch gewaltige Feu-
wer in die Thor / dieselben abzubrennen / der Parmanissa / der Un-
gern vnd Heuducken bey dem Cansler Hauptman (der zu der zeit Key-
ser Maximiliani schelmischer weise ehliche Häuser in Ungern den
Türcken verraten vnd folgendts flüchtig worden) wolte mit grosser
gewalt in die Stadt / vnd ist schwerlichen zu erhalten gewest. In des

gehet der König auff's Rathhaus vnd tractiert wie man die Stadt
vnd sich selbst ergeben wolte / wird eine Fane über die maure gesteckt
ein Trommeter hinaus geschickt / der die *dedition* anmeldet / man helt
mit den grausam schiffen ein wenig inne / jedoch brennet man immer
fort / Graff Scholack wird hinaus geschickt (den ich fürwar für den
Judam halt der den Herrn verkaufft) an stat ihre May. mit dem
Cansler zu tractiren / dieser als er hinaus kömet / steigt der Cansler
vom Ross / empfehet vnd helfet in / geht mit im allein besonders vnd
gießen vollende die Blocken / in des gebeut der Cansler / dz kein schus
mehr in die Stadt geschehen solte / welches 2. Polacken vbertreten /
aber ihn seind alsbald die Köpffe für ledern Thor einen abgehawen
worden / Dieser Graff Scholack kompt zu rucke meldet kurz an / der
Grosmechtige Gros Cansler / vnd oberster Feldherr in Polen / begeret
entricht zu haben alles schaden vnd vnkosten so in Polen geschehen
vnd auffgangen / das er sich des Königlich Titels der Cron Po-
len nicht gebrauchen / vnd dasselbe verschweren für sich vnd die set-
men / auch sich nimmermehr der Cron weiter annemen wolle / alles
was in der Stadt were / der Kriegsleute oder der Bürgerschaft / dz
es preis geben würd / man achtet er Maximilianus were nicht zu
Arm / das er nicht ein mehrers der Bürgerschaft wider erflatten
könte / vnd diese Punet solt er vnuerziehen willigen / Wolte er nicht
vrsach geben zu mehrern Christen Blut zu vergiessen / dessen schon
zuviel vergossen were / es solte ihm ein Fürstlich Befengnis gehalten
werden / als einem Herren der aus diesem Hause geboren / welches
viel Keyser vnd Könige geben / man schicket endlich mal hin vnd wi-
der / kunte aber nichts erhalten werden / endlich begert der Cansler
zwölff fürnehmste vater dem Könige / Die solten hinaus ins Lager /
vnd an stat ihre Keyserliche Mayestat geisel sein / So solten an-
der zwölff vom Cansler geschickt werden / welche man diese Nacht
zwischen den 24. vnd fünff vnd zwanzigsten Januarij / Sonntag vnd
Montag verwaren solte / weil man so tractiret / leset der König in
der Stadt drey grosse Casten mit brieffen vnd Register verbrennen /
er auch selber zurüch ehliche Brieff / vnd leschet alles vffm Rathhaus
gar

gar fleißig aus / was er in sein Schreibtäfflein geschrieben / Gehrt
also vom Rathhaus in sein Losament / vnd werden 12. hinaus
zum Cansler geschickt / die ihm doch nicht annemlichen waren / diß
geschach eine stunde in der nacht / die 12. werden wider zu rücke ge-
schickt / Vnd lest sich der Cansler anmelden / diß vnd kein anders
könnte sein / J. F. G. solten sich selbst hinaus gefenglichen *präsentu-
ren*, sonst würd noch viel Christliches Bluts vergossen werden / dar-
an er wolte entschuldiget sein / denn er nicht ferner sein volck erhalten
könnte. Der frome Herr lechelt ein wenig / vnd ließ im die Taffel be-
reiten / vnd aß ein Keyhünlein / vnd tranck ein Glas Wein aus / setzel
sich hernach auff ein Ross / vnd reit mit 12. hinaus ins Lager / da der
ganze seger zu Abends drey geschlagen.

Der Erste war Graff Stanisla von Surlaw / Beywade zu
Polen / der ander / Herr Andreas Schworowitsky / Feld Mar-
schalek / der dritte / der Bischoff von Kitow / der vierde ein sehr Al-
ter Man Kruerendarius von Cracow / der fünffte / Herzog Alexan-
der aus Littawen / der sechste / der Dechant von Gnieß / der sieben-
de / Herr Casimirus von Liechtenstein / Feldoberster / der achte / Herr
Engelhart Kutsch oberster vbers fuhuoek / der neunde / Herr Jacob
Leuffel Oberster Cammerer / der zehende / Herr Hans Friederich
Hoffman Cammerrath / der eilffte / Herr Frank Reinhiller Cam-
merrath / der zwölffte / Herr von Stehning / Ihnen allen Ritt der
Graff Scholack vor / der warlich dieser Verretheren ein anfang
war / vnd vnterrichtet den fromen Herrn / wie er sich gnugsam demü-
tigen solte / vor den Cansler. Wie nun der König ins Lager köm-
met / gehet im der Grosß Cansler entgegen weinend / vnd bittet in / dz
ihm nicht zuzumessen / das er wider das Hochlöbliche Haus Oster-
reich vnd wider seine Person vorgenommen / das so viel Christliches
Bluts vergossen were / die Losen Leute / so ihn den frommen Herren
verführet / weren des Ursach / sie hetten das ihre in Polen schendlich
anworden / dörfsten nicht darinnen sein / Derwegen hetten sie des
frommen Herren frömmigkeit misbrauchet / Vermeinende die
Freiheit

Freiheit in Polen wider zu drücken / (Die doch alle Redliche Polack
cken zu Bertheidigen / Weil eine Ader in ihnen wehre / Gedenccken)
Vnd alles wider Noth zu steigen / hat ihn also bey der Hand genomi-
men / In sein Losament geführet / im dasselbe eingereumet / vnd etli-
che Stunden mit im conuersire auffss freundlichste / aber doch aus fals-
chem herken / daher Kön. Maximilianus fleissig vor all die seinen
gebeten / wenn es nicht geschehen were / het man vns zu morgen früe /
alle nider gehawen / also wehren der Polacken vnd Ungern Gemü-
ter gegen vns verbittert / diese nacht hielten die Feinde stille / wurde
nichts feindlichers ohne den Brand fürgenommenen / haben vor der
Stade Jubiliret / gepuffen / gesungen vnd gesprungen

Montags frü / den 25. Januarij am Tage Pauli bekerung /
machte man ohn gefehr zwey Stunden auffn Tage die Thor auff / vnd
lies etliche Polnische Obersten / als den Feldobersten / Fahrenbeck
den Parmanson / Den Wepherin / vnd den Herrn Liechtenstein /
den Herrn Kurt vnd den obersten Cammerherrn / Herren Lebellin
hinnein / Die haben des Königs sachen alle besichtiget / geschrieben
vnd versiegelt / man hielt diesen Tag gar stille / vnd wusten noch nit
was man mit vns anfangen würde / allein diesen Trost hetten wir /
man würde alle Deutschen nider hawen. Auff den Dinstag früe den
26. Januarij / komet obgemelte oberst n wider heim / thun des Kö-
nigs vnd ander Herrn sachen in die Kirchen / beschreiben die Noth /
vnd vnuersehens lest man vnblasen / welche zum hoffe gehörten / sol-
ten sich alsbald zu hauff verfügen / wer hinderstellig bliebe / mit dem-
selben würde vbel gefaren werden / wie wir zu hauffe komet / kamen
Cammerer / Truckische Offerirer Trabanten / vnd das ganze Hoff-
wesen / fenget Parmanissa an / der Grosmechtige gros Cankler /
wolte vns allen das Leben Kriegsbrauch nach schencken / mit diesem
beding / das wir alsbaldt einen Eidt theten / Das wir am Thore die
Wehren / Büchsen / tödliche waffen / auch alles Silber vnd Goldt
niderlegen solten / bey welchem darnach ein hellers werd gefunden
würde / den solte man in beysein der andern auff stücken hawen / da
wir alles nidergelegt / haben wir den andern Eidt thun müssen / in 14.
tagen

lagen kein Schwert wider die Cron Polen zu zücken/ist also das Thor
auffgemacht worden/da hat der Cansler nicht weit vom Thor/auff
einem Weissen Koffe gehalten/hat einen Ungerischen Feilblaum/
beis mit Lüssen gefüttert an/Hinter ihm füret man auff einer Cope
ein Ungerisch Hütlein/darauff drey grosse weisse Strausfedern wa-
ren/neben ihm auff beiden seiten hielten die fürnehmsten Herrn vnd
Polacken/ gegen einander vber ein Ross hat man an dem andern ei-
nen sehr langen weg/da mussten wir Freyherrn vom Adel vnd andere
alzumal zu fusse durch passieren/sie alzumal hielten auff beiden seiten
sre Dissacken/gleich als sie auff vns nein schlagen wolten/hinter ih-
nen hielten die andern kriegsleute/mit iren fenlein/zu eusserst im feld
hielten Kossacken vnd Tartern/da waren wir in grosser gefahr/denn
sie mit grosser mühe von iren Hauptleuten erhalten worden/das sie
nicht in vns fielen/vnd vns also wehrlos vberfallen hetten/da kam
der GrosCansler hinaus/hette etlich auffgezeichnet/welche die vor-
nehmsten Herrn vnd vom Adel waren/die foderte er aus dem hauffen
mussten wider zu rücke/das sie sich Kanjowen liessen/Zu vns aber
thet der alte Sachs mit hefftigen weinen eine sehr tapffer Rede/sich
entschuldiget/das er solch Blutbad nicht angerichtet/schub alles auff
die losen leute/die den frommen Maximilianum/den er höchlich rüh-
m. t verführet/das er sich des Königreichs des er nicht besüget/ange-
nommen hette/er were dem Maximiliano von Herken geneiget/vnd
wolt in mit vns los lassen/wenn es in seiner macht stünde/brauchte
dazu viel auserlesene wort/vnd bat endlichen/wir wolten jederzeit sei-
ner zum besten gedencken/vnd wünschte vns zum offtermal eine glück-
selige reise/vnd damit wir vor den Tartern so vmb vnd vmb brenten
deso sicher weren/gab er vns hundert Pferde Deutsche/vnd hundert
Ross Kossacken-die mussten sich vereiden/das sie vns wol vnd sicher
geleiten wolten/hinwider sagten wir im zu/sie vnter wegens wenn sie
anstos leiden solten/widerumb zuuertreten/Also höttelten wir einan-
der nach wehrlos fast bey 1500/da hette man gesehen/diese so vor ge-
ritten vnd gefaren/vnd vielleicht ir lebtag keine meile gegangen/Auff
des Apostel pferde dauon traben / bin also im namen Gottes mit den
andern

W

andern

andern auff Ramslaw zu gangen/ da man vns weit vmbgefuret/ das
wir den Tarnern nicht in die hende kommen möchten/ die vmb vnd vmb
vmb vns waren. Diese Nacht haben wir ober zwey hundert fener
gesehen/ zwischen den 25 vnd 26 Januarij Dinstags vnd Mitwochs/
die haben vns dermassen / auff vier Meilen lang geleuchtet / das wir
als bey dem hellsten Mondschein haben gehen können/ vnd haben alle
Dörffer weg gebrandt/ bis auff eine viertel meile von Ramslaw/
auff die Mitwochen fröhe/ den 27 tag Januarij/ hat man die Sachen
aus der Kirchen zu Pitschen ins Lager geführet / vnd ist der Cansler
mit den vornembsten abgezogen/ dem gemeinen losen volcke/ als Pos-
lacken/ Kossacken vnd Tarnern/ Ist das Stedlein vnd Bürgerliche
habe frey gegeben/ die sein mit gewalt hinnein gefallen/ alles was sie
gefunden/ hinweg genommen/ die armen Bürger also gemartert/ vnd
bis auffs hembde ausgezogen/ das sie haben bekennen müssen/ wo sie
das Geldt haben / den Bürgermeister auch hefftig gemartert / Auch
den Stadtschreiber/ das sie den gemeinen Stadt schatz haben offenba-
ren müssen/ den Stadtschreiber mit Weib vnd kind/ auch andere wei-
ber/ Jungfrauen vnd Kinder weg gefuret/ vnd geschendet in bey sein
vnd angesticht irer Menner vnd Eltern/ darnach ausgezogen/ vnd al-
so zusammen gebunden/ vnd wie das vieh getrieben/ die kleine Kinder
mit Henden vnd Füßen zusammen gebunden / vnd also an die Sattel-
knöpf wie gebundene Vögel angehenckt/ von dannen gefuret/ auch
viel Dörffer verbrennet/ vnd an Menschen vnd viche ein grosse sum-
ma mit jemerlichen weinen vnd heulen hinweg getrieben/ vnd end-
lichen die Stad angesteckt/ vnd im grund/ bis auff zwey arme Neuss-
lein Kirch vnd Rathhaus ausgebrennet/ dis ist geschehen wider des
Canslers zusage / der ihnen kein Haar zu krümmen zuvor zugesaget/
als er den Raht am Montag zuvor hinnaus gefordert/ dz sie die Tod-
ten zu hauff führten/ darmit sie möchten begraben werden/ vnd sind
am Montag des 25 Januarij zu hauffe geführet worden vber 2500.
Todten/ die in Welden seind erst hernacher zugefuret worden/ ich für
mein Person/ komme mehr denn vber dreyhundert thaler/ habe zwar
etliche Sachen dort vergraben/ Bin aber der meinung / Weil sie die
ganke

ganze Stad durch graben haben/ sie werden auch meine Sachen ge-
funden/ ich bin mit meinem trewen Gott wol zu frieden / weil er mich
nur mit guter gesundheit/ohne beleidigung des Leibes/ aus dieser sehr
grossen gefahr erledigt hat / ihm sey lob vnd danck/ der wird mir dis
mein Unglück/ mit besten Stück erstaten/wird dem frommen Maxi-
miliano ein glück auffstehen/ so blühet meines mit / wer wolle bey ei-
nem solchen Herren nicht sein Gut vnd Blut wagen/das die schanze
ist so vbel geraten/ habē wir zu dancken vnsern sünden / weil wir den
Feind so sehr verachteten/ im saus vnd braus lebten/ sofften/ spielten
vnd parcktierten/das ich andere sachen nicht nenne / da musste ja ein
Prügel zum hunde gelegt werden/ nun hoffen wir/ Gott werde vns
bessern friede verleihen/ wo ferne wir nicht grosse vrsachen zum Un-
frieде geben werden. Man besetzt jekund die Grenze allhier/vnd ma-
chet einen Zaun vmb das Dorff/ da dir grosse Schaden geschehen/
alles im Rosenberghischen/ Creutzbergischen/ Pignischen / Volun-
schen/bis an Namslaw/ lieget in der Aschen Der Allmechtige
vnd ewig Gott/ tröste den fromen Herrn in seinē gefeng-
nis/vnd verleihe ihm eine Väterliche entledi-
gung/ Amen. Datum den 4 tag Fe-
bruarij / Anno 1588.



Faint, illegible text, likely bleed-through from the reverse side of the page.



154782

AB: 154782

ULB Halle


3


001 536 176



sb-796







14
Neue Zeitung
Wahrhaftiger vnd gründlicher
bericht vnd anzeigung / des ganzen Han-
dels vnd schlacht / So sich wegen der Cron Polen / zwis-
schen dem Gros Kanzler / vnd König Maximilliano /
vnd für Pilschen in Schlesien geschehen /
zugetragen / Anno 1588.



Erstlich Gedruckt zu Ulmütz / Im Jar 1588.

